

## **Ard-Stiúrthóireacht na gComhpháirtíochtaí Idirnáisiúnta (INTPA)**

Foilsíú folúntais d'fheidhm

Príomhchomhairleoir “Deontóirí atá ag teacht chun cinn” (Grád AD14)

(An Bhruiséil)

(Airteagal 29(2) de na Rialacháin Foirne)

COM/2023/10438

### **Cé sinn**

Is é an misean atá ag Ard-Stiúrthóireacht na gComhpháirtíochtaí Idirnáisiúnta (AS INTPA) rannchuidiú leis an bhforbairt inbhuanaithe, le díothú na bochtaineachta, leis an tsíocháin agus le cosaint chearta an duine, trí chomhpháirtíochtaí idirnáisiúnta a sheasann le leasanna agus luachanna na hEorpa agus a chuireann chun cinn iad.

AS INTPA:

- tá ról ceannasach aici maidir le beartais an Aontais a cheapadh i réimse an chomhair idirnáisiúnta agus maidir le comhpháirtíochtaí a fhorbairt le tíortha agus le heagraíochtaí idirnáisiúnta ar fud an domhain,
- oibríonn sí in éineacht le seirbhísí an Choimisiúin lena chinntiú go dtreisiónn gné sheachtrach bheartais an Aontais a ghníomhaíocht ar domhan,
- oibríonn sí i ndlúthchomhar leis na Ballstáit faoi chur chuige láidir Team Europe chun tacú le clár oibre domhanda an Aontais,
- bunaíonn sí a ghníomhaíochtaí ar an dlí idirnáisiúnta agus ar an iltaobhachas agus tá sí ar thús cadhnaíochta in iarrachtaí an Aontais Eorpaigh gealltanais dhomhanda a chur i bhfeidhm, go háirithe Clár Oibre 2030 na Náisiún Aontaithe agus Spriocanna Forbartha Inbhuanaithe agus Comhaontú Pháras maidir leis an Athrú Aeráide,
- tá sí freagrach as, ar a conlán féin nó i gcomhar leis an tSeirbhís Eorpach Gníomhaíochta Seachtraí, clársceidealú ilbhliantúil agus cur i bhfeidhm ionstraimí seachtracha an Aontais,
- cuireann sí a beartais agus a cláir i bhfeidhm trí Thoscaireachtaí an Aontais Eorpaigh i dtíortha comhpháirtíochta agus in eagraíochtaí idirnáisiúnta. Chun na críche sin, déanann sí na córais bhainistíochta, mhaoirseachta, tacaíochta agus rialaithe is gá, a shainiú, a bhunú agus a reáchtáil chun na leibhéil rialtacha, cháilíochta, tionchair agus infheictheachta is airde a chinntiú sna cláir a chuirtear chun feidhme.

### **An tairiscint**

Feidhm nua Príomhchomhairleora in AS INTPA a chuirfidh tacaíocht ar fáil don Ard-Stiúrthóir maidir le machnamh straitéiseach agus comhairle i leith deiseanna nua rannpháirtíochta agus comhpháirtíochta le líon roghnaithe deontóirí nach Eorpaigh atá ag teacht chun cinn a lorgaíonn comhoibriú le tíortha atá i mbéal forbartha chomh maith.

Tabharfaidh an Príomhchomhairleoir tacaíocht don Ard-Stiúrthóir agus do na seirbhísí maidir le sineirgí agus féidearthachtaí i dtaobh gníomhaíochtaí comhlántacha a threisiú leis na tíortha sin, agus

dá réir sin , rannchuidiú le hathrú ó bhonn i dtíortha comhpháirtíochta agus dul i ngleic le dúshlán dhomhanda.

### **Cad atá á lorg againn (na critéir roghnúcháin)**

Ba cheart na scileanna seo a leanas a bheith ag iarrthóirí:

#### **Buanna pearsanta**

- Meon straitéiseach, breithiúnas polaitiúil fóna agus sárscileanna anailíseacha, agus cumas dea-fhorbartha a léiriú teacht ar smaointe nuálacha cruthaitheacha agus pleananna gníomhaíochta soiléire, comhtháite agus réalaíocha a chur i láthair;
- Sárscileanna idirbheartaíochta, cumarsáide agus comhordaithe, cumas labhairt go héifeachtach le páirtithe leasmhara inmheánacha agus seachtracha ar ardleibhéal, lena n-áirítear taithí nithiúil ar chomhordú agus/nó idirbheartaíocht a dhéanamh ag leibhéal idirinstiúideach agus/nó idirnáisiúnta;
- Cumas tosaíochtaí a leagan síos agus cinntí a dhéanamh.

#### **Sainscileanna agus saintaithí**

- Cur amach an-mhaith agus saineolas ar bheartais inmheánacha agus sheachtracha an Aontais Eorpaigh agus ar institiúidí an Aontais Eorpaigh;
- Sárthuisicint ar ionstraimí airgeadais an Aontais Eorpaigh i leith gníomhaíocht sheachtrach agus ar a mhódúlachtaí mionsonraithe maidir le cur chun feidhme;
- Eolas an-mhaith ar struchtúr agus ar eagrú na hArd-Stiúrthóireachta, lena n-áirítear eolas ar ról agus ar ghnéithe líonra thoscaireachtaí an Aontais;
- Eolas agus taithí ar shaincheisteanna buiséadacha, airgeadais agus ar shaincheisteanna a bhaineann le bainistíocht chothrománach;

#### **Scileanna comhairleacha**

- taithí chruthaithe agus cumas seanbhunaithe ar shainchomhairle a chur ar fáil agus ar thuairimí a léiriú ar leibhéal sinsearach;
- sárthuisicint pholaitiúil agus tuiscint ar thimpeallacht pholaitiúil dhomhanda;

### **Ní mór na cáilíochtaí seo a bheith ag iarrthóirí (ceanglais incháilitheachta)**

Ní dhéanfar iarrthóirí a mheas don chéim roghnúcháin ach amháin ar bhonn na gceanglas foirmiúil seo a leanas nach mór a chomhlíonadh **faoin spriocdháta d'iarratais**:

- Náisiúntacht: ní mór d'iarrthóirí a bheith ina saoránaigh de Bhallstát den Aontas Eorpach.
- Céim ollscoile nó dioplóma: ní mór d'iarrthóirí:
  - leibhéal oideachais a bheith acu is comhionann le cúrsa iomlán ollscoile ar baineadh dioplóma amach dá bharr i gcás ina maireann an ghnáth-thréimhse oideachais ollscoile 4 bliana nó níos mó;
  - sin nó leibhéal oideachais a bheith acu is comhionann le cúrsa iomlán ollscoile ar baineadh dioplóma amach dá bharr agus taithí ghairmiúil iomchuí dar fad bliain amháin ar a laghad i gcás

ina maireann an ghnáth-thréimhse oideachais ollscoile 3 bliana ar a laghad (ní féidir an bhliain amháin sin de thaithí ghairmiúil a chur san áireamh sa taithí ghairmiúil iarchéime a iarrtar thíos).

- Taithí ghairmiúil: ní mór d'iarrthóirí ar a laghad 15 bliana de thaithí ghairmiúil iarchéime <sup>1</sup> a bheith acu ag leibhéal cuí de réir na gcáilíochtaí thuasluaite.
- Taithí chomhairleach: ní mór 5 bliana ar a laghad den taithí oibre iarchéime a bheith faighte i bpost comhairleach ardleibhéil<sup>2</sup>.
- Teangacha: ní mór d'iarrthóirí eolas críochnúil a bheith acu ar cheann de theangacha oifigiúla an Aontais Eorpaigh<sup>3</sup> agus eolas sásúil a bheith acu ar cheann eile de na teangacha oifigiúla sin. Deimhneoidh na painéil roghnúcháin le linn na n-agallamh an gcomhlíonann iarrthóirí an ceanglas maidir le heolas sásúil ar cheann eile de theangacha oifigiúla an Aontais Eorpaigh. Mar chuid den tástáil chéanna d'fhéadfaí an t-agallamh nó cuid den agallamh a dhéanamh sa teanga eile sin.
- Teorainn aoise: ní mór do na hiarrthóirí a bheith faoi bhun na gnáthaoise scoir, aois atá sainithe d'oifigigh an Aontais Eorpaigh mar dheireadh na míosa inar shlánaigh an duine 66 bliana (féach Airteagal 52, pointe (a) de na Rialacháin Foirne <sup>4</sup>).

## Roghnú agus ceapachán

Is de réir nósanna imeachta roghnúcháin agus earcaíochta an Choimisiúin Eorpaigh a dhéanfar an roghnú agus an ceapachán (féach: Doiciméad maidir leis an mBeartas um Oifigigh Shinsearacha <sup>5</sup>).

Mar chuid den phróiseas roghnúcháin seo, cuirfidh an Coimisiún Eorpach painéal réamhroghnúcháin ar bun. Déanfaidh an painéal sin anailís ar na hiarratais go léir, rachaidh sé ar aghaidh leis an gcéad fhíorú incháilitheachta agus sainaitheoidh sé na hiarrthóirí a bhfuil na próifíil is fearr acu i bhfianaise na gcritéar roghnúcháin atá luaite thuas, agus a bhféadfaí cuireadh a thabhairt dóibh agallamh a dhéanamh leis an bpainéal réamhroghnúcháin.

Tar éis na n-agallamh sin, dréachtóidh an painéal réamhroghnúcháin a thuairimí agus molfaidh sé liosta iarrthóirí le haghaidh agallamh eile le Coiste Comhairleach an Choimisiúin Eorpaigh um Cheapacháin. Cuirfidh an Coiste Comhairleach um Cheapacháin na tuairimí ón bpainéal réamhroghnúcháin san áireamh agus é ag cinneadh cé na hiarrthóirí a dtabharfar cuireadh chun agallamh dóibh.

Na hiarrthóirí a dtabharfar cuireadh chun agallamh leis an gCoiste Comhairleach um Cheapacháin dóibh, glacfaidh siad páirt in ionad measúnaithe bainistíochta a mhairfidh lá iomlán agus a reáchtálfaidh comhairleoirí earcaíochta seachtracha. Tiomsóidh an Coiste Comhairleach um Cheapacháin gearrliosta d'iarrthóirí a mheasann sé a bheadh oiriúnach don fheidhm, agus torthaí an agallamh agus tuarascáil an ionaid measúnaithe á gcur san áireamh aige.

<sup>1</sup> Ní chuirtear taithí ghairmiúil san áireamh ach amháin más caidreamh oibre iarbhrí atá i gceist léi, caidreamh atá sainmhínithe mar obair cheart a bhfuair an t-iarrthóir pá aisti mar fhostaí (ar aon chineál conartha) nó mar sholáthraí seirbhíse. Is ar bhonn *pro rata* a dhéanfar gníomhaíochtaí gairmiúla a rinneadh ar bhonn páirtaimseartha a ríomh, de réir an chéatadáin dheimhnithe de na huairéanta lánaimseartha a d'oibrigh an t-iarrthóir. Cuirtear saoire mháithreachais/saoire do thuismitheoirí/saoire chun páiste a uchtú san áireamh más faoi chuimsiú conradh oibre a glacadh an tsaoire sin. Déantar dochtúireachtaí a chomhshamhlú le taithí ghairmiúil, fiú amháin nuair nach dochtúireachtaí ar pá iad, ach déantar sin ar feadh uastréimhse 3 bliana amháin, ar choinníoll gur éirigh leis an iarrthóir an dochtúireacht a bhaint amach. Ní féidir tréimhse ar leith a chomhaireamh ach uair amháin.

<sup>2</sup> Ba cheart d'iarrthóirí na níthe seo a leanas a shonrú go soiléir ina gcuiraclam vitae i gcás na mblianta uile ina bhfuair siad taithí chomhairleach: (1) teidil agus dualgais na bpost a bhí acu; (2) an réimse beacht ábhair mar aon leis an leibhéal san eagraíocht lenár bhain an post (líon na leibhéil céimlathach os a chionn agus faoina bhun); (3) na línte tuairiscithe do gach post a bhí acu.

<sup>3</sup> <https://eur-lex.europa.eu/legal-content/GA/TXT/?uri=CELEX%3A01958R0001-20130701>

<sup>4</sup> <https://eur-lex.europa.eu/legal-content/GA/TXT/?uri=CELEX%3A01962R0031-20140701>

<sup>5</sup> [https://commission.europa.eu/jobs-european-commission/job-opportunities/managers-european-commission\\_ga#documents](https://commission.europa.eu/jobs-european-commission/job-opportunities/managers-european-commission_ga#documents) (ar fáil i mBéarla amháin)

Is é an Comhalta/ís iad na Comhaltaí ábhartha den Choimisiún a chuirfidh agallamh ar na hiarrthóirí atá ar ghearrliosta an Choiste Chomhairligh um Cheapacháin.

I ndiaidh na n-agallamh sin, déanfaidh an Coimisiún Eorpach an cinneadh ceapacháin.

Ní mór don iarrthóir a roghnófar aon oibleagáid dlí a bhaineann le seirbhís mhíleata a bheith comhlíonta aige, teistiméireachtaí carachtair cuí a chur ar fáil maidir lena oiriúnaí atá sé i dtaca lena chuid dualgas a dhéanamh, agus a bheith in ann ag dualgais an phoist ó thaobh folláine coirp de.

Ba cheart don iarrthóir a roghnófar deimhniú bailí imréitigh slándála óna údarás náisiúnta slándála a bheith aige nó a bheith in ann an deimhniú sin a fháil. Is éard atá in imréiteach slándála pearsanta cinneadh riaracháin a dhéantar i ndiaidh grinnfhiosrúchán slándála a chur i gcrích, grinnfhiosrúchán a dhéanann údarás náisiúnta slándála inniúil an iarrthóra i gcomhréir leis na dlíthe agus na rialacháin náisiúnta slándála is infheidhme, agus lena ndeimhnítear go bhféadfar cead a thabhairt do dhuine aonair rochtain a fháil ar fhaisnéis rúnaicmithe suas le leibhéal áirithe. (Tabhair do d'aire gur ar iarraidh an fhostóra amháin is féidir tús a chur leis an nós imeachta is gá maidir le himréiteach slándála, agus ní ar iarraidh an iarrthóra).

Ní bheidh rochtain ag an iarrthóir ar fhaisnéis rúnaicmithe an Aontais Eorpaigh (FRAE) ar an leibhéal CONFIDENTIEL UE/EU CONFIDENTIAL nó os a chionn sin, agus ní fhreastalóidh an t-iarrthóir ar aon chruinniú ag a bpléifear FRAE den sórt sin, go dtí go dtabharfaidh an Ballstát lena mbaineann an t-imréiteach slándála pearsanra agus go gcuirfear an nós imeachta imréitigh i gcrích leis an seisiún faisnéise, a bhfuil ceangal dlí leis, ó Stiúrthóireacht Slándála an Choimisiúin.

## **Comhdheiseanna**

I gcomhréir le hAirteagal 1d de na Rialacháin Foirne, tá cuspóir straitéiseach á shaothrú ag an gCoimisiún an comhionannas inscne a bhaint amach ar gach leibhéal bainistíochta faoi dheireadh a shainordaithe reatha agus cuireann sé beartas comhdheiseanna i bhfeidhm lena spreagtar iarratais a d'fhéadfadh cur leis an éagsúlacht, leis an gcomhionannas inscne agus leis an gcothromaíocht gheografach fhoriomlán.

## **Coinníollacha fostaíochta**

Tá na tuarastail agus na coinníollacha fostaíochta leagtha síos sna Rialacháin Foirne.

Is mar oifigeach ar ghrád AD14 a earcófar an t-iarrthóir a roghnófar. Rangófar é i gcéim 1 nó i gcéim 2 laistigh den ghrád sin, de réir fhad a thaithí ghairmiúil roimhe sin.

Ba chóir don iarrthóir a roghnófar a thabhairt dá aire go gceanglaítear de réir na Rialachán Foirne nach mór do gach ball foirne nua tréimhse phromhaidh 9 mí a chur i gcrích agus toradh sásúil uirthi.

Is sa Bhruiséil atá an t-ionad oibre.

## **Neamhspleáchas agus dearbhú leasanna**

Beidh sé de cheangal ar na hiarrthóirí dearbhú a thabhairt go bhfuil siad tiomanta do bheith ag gníomhú go neamhspleách ar mhaithe le leas an phobail agus dearbhú a thabhairt maidir le haon leas atá acu a d'fhéadfaí a mheas a bheith dochrach dá neamhspleáchas.

## Eolas tábhachtach d'iarrthóirí

Cuirtear i gcuimhne d'iarrthóirí gur faoi rún atá an obair a dhéanann na painéil roghnúcháin. Tá cosc ar iarrthóirí dul i dteagmháil, bíodh sé díreach nó indíreach, le comhaltaí na bpainéal sin, agus tá cosc ar dhuine ar bith eile déanamh amhlaidh thar a gceann. Ní mór gach fiosrúchán a sheoladh chuig rúnaíocht an phainéil lena mbaineann.

## Cosaint sonraí pearsanta

Cinntoidh an Coimisiún go bpróiseálfar sonraí pearsanta na n-iarrthóirí mar a cheanglaítear le Rialachán (AE) 2018/1725 ó Pharlaimint na hEorpa agus ón gComhairle <sup>6</sup>. Baineann sé sin go háirithe le rúndacht agus le slándáil na sonraí sin.

## Nós imeachta um iarratais

Sula gcuirfear an t-iarratas isteach, ba cheart don iarrthóir a sheiceáil go cúramach an gcomhlíonann sé gach ceann de na riachtanais incháilitheachta ('Ní mór na cáilíochtaí seo a bheith ag iarrthóirí'), go háirithe iad sin a bhaineann leis na cineálacha dioplóma, an taithí ghairmiúil ardleibhéil agus an acmhainn teanga atá ag teastáil. Más rud é nach gcomhlíonann iarrthóir aon cheann de na riachtanais incháilitheachta, eisíofar é go huathoibríoch ón bpróiseas roghnúcháin.

Más mian leat iarratas a dhéanamh, ní mór duit clárú tríd an idirlíon ar an suíomh gréasáin seo thíos agus na treoracha maidir leis na céimeanna éagsúla den phróiseas a leanúint:

<https://ec.europa.eu/dgs/human-resources/seniormanagementvacancies/>

Ní mór seoladh ríomhphoist bailí a bheith agat. Bainfear úsáid as an seoladh ríomhphoist sin chun do chlárú a dheimhniú agus chun dul i dteagmháil leat ag céimeanna éagsúla den phróiseas. Dá bhrí sin, coinnigh an Coimisiún Eorpach ar an eolas faoi aon athrú ar do sheoladh ríomhphoist.

Chun d'iarratas a chur i gcrích, ní mór duit CV a uaslódáil i bhformáid PDF, ag úsáid fhormáid an CV Europass<sup>7</sup> más féidir, agus litir spreagtha a líonadh amach, ar líne (8,000 carachtar ar a mhéad). Is féidir leat an CV agus an litir inspreagtha a chur isteach in aon cheann de theangacha oifigiúla an Aontais Eorpaigh.

Is chun do leasa é a chinntiú go bhfuil d'iarratas cruinn, críochnúil agus fírinneach.

Ar chríochnú do chlárúcháin ar líne duit, gheobhaidh tú ríomhphost a dheimhneoidh gur cláraíodh d'iarratas. **Mura bhfaighidh tú ríomhphost deimhnithe, níor cláraíodh d'iarratas!**

Tabhair do d'aire nach féidir monatóireacht a dhéanamh ar dhul chun cinn d'iarratais ar líne. Rachaidh an Coimisiún Eorpach i dteagmháil go díreach leat maidir le stádas d'iarratais.

<sup>6</sup> Rialachán (AE) 2018/1725 ó Pharlaimint na hEorpa agus ón gComhairle an 23 Deireadh Fómhair 2018 maidir le daoine nádúrtha a chosaint i ndáil leis an bpróiseáil sonraí pearsanta a dhéanann institiúidí, comhlachtaí, oifigí agus gníomhaireachtaí an Aontais agus maidir le saorghluaiseacht sonraí den sórt sin, agus lena n-aisghairtear Rialachán (CE) Uimh. 45/2001 agus Cinneadh Uimh. 1247/2002/CE (IO L 295, 21.11.2018, lch 39).

<sup>7</sup> Tá eolas le fáil faoi conas CV Europass a chruthú ar líne ag: <https://europa.eu/europass/ga/create-europass-cv>

**Ní ghlacfar le hiarratais a sheolfar trí ríomhphost.** Má tá tuilleadh eolais uait nó má bhíonn fadhbanna teicniúla agat, seol ríomhphost chuig: [HR-MANAGEMENT-ONLINE@ec.europa.eu](mailto:HR-MANAGEMENT-ONLINE@ec.europa.eu)

Is fútsa atá sé do chlárú ar líne a chríochnú in am. Moltar go láidir duit gan fanacht go dtí cúpla lá roimh an dáta deiridh chun iarratas a dhéanamh, mar go bhféadfadh trácht trom ar an idirlíon nó fadhb a bhaineann leis an nasc idirlín deireadh a chur leis an gclárúchán ar líne sula mbeadh sé críochnaithe agat, rud a d'fhágfadh go gcaithfeá an próiseas clárúcháin a thosú athuair. Nuair a bheidh an sprioc-am le hiarratas a chur isteach thart, ní bheidh tú in ann tuilleadh sonraí a chur isteach. Ní ghlacfar le clárúcháin dhéanacha.

### **Dáta deiridh**

Is é an **29/09/2023, 12.00 meán lae, am na Buiséile**, an sprioc-am le clárú. Ní féidir clárú ina dhiaidh sin.